

四庫全書

經部

欽定四庫全書

春秋說卷十一

宋 洪咨夔 撰

僖公下

八年春王正月公會王人齊侯宋公衛侯許男曹伯陳世子欽盟于洮鄭伯乞盟

逃者匹夫之行乞者塗丐之節春秋疾鄭之反覆故其辭皆特筆夫伯業一出於假惟其假也故隨假而隨歸是會假王人以為重逃盟之鄭乞盟不暇苟能

躬脩王觀奉王靈以號令列國誰敢不從澗瀍在望
一葦可杭王人能來桓公不能往其何以固狙詐攜
貳之心哉王人雖微諸侯北面受盟於其下冠履常
分百世不與易也

夏狄伐晉

齊人伐戎以來戎寢衰而狄獨強入邢入衛交亂中
國桓公方經營南方之楚未暇及狄隨其病而療之
亦不敢肆惟晉不與諸侯會盟狄窺其孤敢為是伐

信中國不可無伯也

秋七月禘于大廟用致夫人

左氏致哀姜穀梁致成風公羊致聲姜其說雖不同而哀姜與弑不可祔姑成風妾母不可配夫聲姜不見納幣逆女之本末皆致所不宜致也王者禘其祖之所自出魯僭用之已非禮又以致非所宜致之夫人失禮甚矣前禘以吉行今禘以致用周公其衰一至於此

冬十有二月丁未天王崩

自齊之伯天王不見於經者數十年僅以崩書天下知有伯主不知有王也天下有王而柄下移伯主之罪也惠王之崩魯不會葬天王何耶

九年春王正月丁丑宋公御說卒

通喪之廢久矣春秋以人子忘三年之愛隨事著貶衛侯晉卒惠公從齊與魯戰雖書葬不書子宋公御說卒襄公從齊與宰周公會雖書子不書葬夫有疆

場之事腰絰衽革猶可自諉從人會伐初非有甚不得已者而父死不葬假變禮以便其私三綱淪矣襄公葬其夫人醯醢百甕明器而實之何厚於伉儷而薄於親也

夏公會宰周公齊侯宋子衛侯鄭伯許男曹伯于葵丘周公以三公為冢宰相成王宰周公其職也坐而論道謂之三公作而行之謂之士大夫面槐之位豈以供行李之後哉前是嘔糾失冢宰之尊親行人之事

猶未無公也今無乎公矣論道經邦師保左右自足
以尊天子而懷諸侯開明堂而觀萬國顧僕僕焉趨
伯主之會與王人微者相後先已則屈矣如王朝之
體何是時惠王崩襄王立而有太叔帶之難桓公誠
有志於定王室率六國執壤奠以修康王尸位之禮
宰周公帥諸侯入應門如太保畢公故事子帶將震
栗退聽之不暇而伯主養尊不朝公宰降尊下會奸
宄有所窺而動何以戢戎心而遏亂萌且王使宰孔

賜齊侯胙既知威顏咫尺獨不能一近穆穆之光乎
伯業莫盛於葵丘之會而東畧西否已不逃於逆料
君子是以為桓公惜

秋七月乙酉伯姬卒

九月戊辰諸侯盟于葵丘

諸侯不序即會葵丘之諸侯也諸侯自盟宰周公先
歸不與也洮盟王人而首止不敢盟世子葵丘不敢
盟宰周公知所尊矣會以夏盟以秋易時之久人無

怠心信伯業之隆也然始焉不軌而五禁明終焉震
矜而九國叛伯業自此畫矣夫惟王道而後體天行
健自強而不息

甲子晉侯詭諸卒冬晉里克殺其君之子奚齊

君有不仁臣不可以讎其君父有不慈子不可以讎
其父驪姬嬖欲立其子而諧殺太子申生獻公誠失
君父之道矣臣子不得而讎也里克為申生傳既不
能護存之有去而已又不能去乃於喪次殺受命繼

位之奚齊是讎其君也申生垂死猶以君老子少為
身後憂而克殺之豈不重申生之憂哉書殺其君之
子克讎君之心著矣

十年春王正月公如齊

公以齊得立十年始朝齊桓公之待列國簡節疎目
如此宜其為五伯之盛也

狄滅溫溫子奔衛

桓王與鄭人蘇忿生之田溫其一也蘇子國溫近在

畿內狄為無道而滅之中國其無人乎狄入邢衛齊
伯業方張能救而城之大義所激狄為之退聽者七
八年至於盟甯毋以招携狄遂伐晉會葵丘而起叛
狄又滅溫以中國盛衰為外寇叛服之候自古然也
晉里克弑其君卓及其大夫荀息

忿心如山莫遏其高怨心如河莫測其深里克一萌
讎君之心割刃驪姬之二子若刈草菅然何其慘也
奚齊以未葬稱子卓以逾年稱君前殺後弑覆出為

惡而惡愈甚與慶父再弑子般閔公同而及其大夫
荀息息許竭股肱之力繼之以死疑若白圭之玷矣
然申生既沒夷吾重耳與奚齊卓皆戎出長少不齊
其為庶等奚齊則命嗣卓其母弟嬖庶奪嫡咎在獻
公不在息息之始傅奚齊終輔卓顧託之命有所承
矣故以死殉君而不失職

夏齊侯許男伐北戎

晉殺其大夫里克

天下無中立之事國語紀驪姬陰託里克之妻克守
不定遂有中立之說克傳太子所難者克若不變
太子可安既不能存於義當去又不能去而連弑二
君原其患得患失之心欲以中立求生免禍而禍卒
不能免苟或之流也稱國以殺殺當其罪其稱大夫
蓋殺於惠公又將圖我之疑而不正其弑君之戮

秋七月

冬大雨雪

冬而雪宜也以大故書

十有一年春晉殺其大夫平鄭父

平鄭里克黨也克見殺平鄭在秦謀出晉君以濟私
怨罪宜討矣然夷吾之立民不見德前日專殺一大
夫今日專殺一大夫而祁舉七輿大夫皆不免刑何
濫乎君之視臣如草芥何以能國

夏公及夫人姜氏會齊侯于陽穀

赫赫姜嫄其德不匱聲姜之德匱矣婦人送迎不踰

閩陽穀之會夫婦偕焉桓公會齊侯於灤與夫人遂如齊拉脅之禍覆轍不遠公豈甘心蹈之哉溺其所甚愛忘其所可戒也况疇昔會陽穀齊侯委端朝諸侯今幾何時乃與魯夫人參會於此伯德其日衰乎

秋八月大雩

冬楚人伐黃

十有二年春王三月庚午日有食之

日食於朔則書朔庚午晦也十年之間食者三先是

食於楚人滅弦之歲後是食於楚人伐徐之歲今茲
食於楚人滅黃之歲天王無剛明之德以照臨四海
而伯擅其權伯主無純一之志以力獎王室而夏
寢有離心陽失其道陰得以干之狄滅溫而莫救戎
伐京師而莫討其為中國患非一楚也故謫見於天
若是其數

夏楚人滅黃

江黃道栢方睦於齊弦子恃之而不事楚楚滅之弦

之滅黃之憂也黃恃諸侯之睦於齊不共楚職楚又滅之非楚能滅之齊滅之也貫之盟陽穀之會江黃慕齊舍楚而來與侈然一時之盛楚人之力非不能即討其叛乃遲之十餘年而後發盼盼然竊窺伯德之勤急以為進退未嘗一日忘也初滅弦以嘗齊齊不救知其怠矣未幾狄滅溫亦不救知其荒矣於是遂啓伐黃之謀自冬而夏黃人效死以守國者非不力忍死以待齊者非不切而遠不能救卒如管仲之

料齊誤黃黃誤弦也書滅弦滅黃皆罪伯

秋七月

冬十有二月丁丑陳侯杵臼卒

十有三年春狄侵衛

政刑明則敵國不敢侮忠信孝悌修則可撻堅甲利
兵內治誠張外難不足弭也文公乘衛為狄滅之後
靡廢不舉宜若可以禦外難矣而狄之虔劉曾不為
之少殺蓋雖能存其亡未能彊其弱也而狄不忌伯

亦無所懲艾馬爾伯主以攘夷尊夏為業伐戎伐楚尚禦其侮狄伐邢入衛伐晉滅溫獨未嘗一辭問其罪彼固傲岸軒張謂莫已若故復有是舉齊果何所怯於狄不一懲之也是時楚人滅黃淮夷病杞狄侵衛侵鄭諸戎伐京師入王城外侮交侵肆無忌憚伯業之衰一至於此吁誠者物之終始始之攘夷尊夏不出於誠終將若之何哉

夏四月葬陳宣公

公會齊侯宋公陳侯衛侯鄭伯許男曹伯于臧

好大之心騁則逐遠而遺近徇義之志移則舍重而
趨輕隨之係小子失丈夫累於私也宰孔謂東畧之
不知西則否矣蓋京師在齊之西其經營西事畫於
葵丘之會而以區區驕盈之心夸示四方將畧於東
矣是會為淮夷病杞故東畧以為會淮之張本非急於
謀王室也時子帶作難諸戎輔之秦晉伐戎以救周
而齊不救方且遣管仲平戎仲孫湫致諸侯以戍周

夫不能戢戎而平戎不能靖周而成周誠於為王室謀者果如是乎故春秋於此數事皆不書

秋九月大雩

冬公子友如齊

十有四年春諸侯城緣陵

舉事以氣為主志氣之氣愈久而不折血氣之氣雖強而易衰淮夷病杞會八國於鹹以謀之公子友如齊春諸侯城緣陵以如齊觀之則齊侯先返其國銳

者憊矣齊侯先返其國諸侯自為杞城身處其逸人
供其勞授役庀工莫相統一無怪乎器用不具城池
未固而去為患不終也城邢城楚丘城緣陵皆有救
災卹難存亡繼絕之義而緣陵之城總舉諸侯譏桓
為可知

夏六月季姬及鄆子遇于防使鄆子來朝

鄭忽配而後廟季姬先與鄆子遇而後歸女德微矣
昏禮廢矣世謂公愛姬使自擇耦而為是遇未面遽

親誠有不近人情者蓋姬許嫁已久公怒鄫子之不朝而未歸故遇於防使朝而請其歸耳入春秋以來鄫未嘗通於魯乃為姬所使而來朝易曰夫子制義從婦凶也鄫子從婦若此宜其有用社之凶

秋八月辛卯沙鹿崩

按自此至僖公三十三年永樂大典並闕今祇錄經文

狄侵鄭

冬蔡侯肸卒

十有五年春王正月公如齊

楚人伐徐三月公會齊侯宋公陳侯衛侯鄭伯許男曹
伯盟于牡丘遂次于匡公孫敖帥師及諸侯之大夫救

徐

夏五月日有食之

秋七月齊師曹師伐厲

八月螽

九月公至自會

季姬歸于鄆

己卯晦震夷伯之廟

冬宋人伐曹

楚人敗徐于婁林

十有一月壬戌晉侯及秦伯戰于韓獲晉侯

十有六年春王正月戊申朔隕石于宋五是月六鶡退

飛過宋都

三月壬申公子季友卒

夏四月丙申鄫季姬卒

秋七月甲子公孫茲卒

冬十有二月公會齊侯宋公陳侯衛侯鄭伯許男邢侯
曹伯于淮

十有七年春齊人徐人伐英氏

夏滅項

秋夫人姜氏會齊侯于卞

九月公至自會

冬十有二月乙亥齊侯小白卒

十有八年春王正月宋公曹伯衛人邾人伐齊夏師救齊五月戊寅宋師及齊師戰于甗齊師敗績狄救齊

秋八月丁亥葬齊桓公

冬邢人狄人伐衛

十有九年春王三月宋人執滕子嬰齊夏六月宋公曹人邾人盟于曹南鄫子會盟于邾己酉邾人執鄫子用之秋宋人圍曹

衛人伐邢

冬會陳人蔡人楚人鄭人盟于齊

梁亡

二十年春新作南門

夏郤子來朝

五月乙巳西宮災

鄭人入滑

秋齊人狄人盟于邢

冬楚人伐隨

二十有一年春狄侵衛

宋人齊人楚人盟于鹿上

夏大旱

秋宋公楚子陳侯蔡侯鄭伯許男曹伯會于孟執宋公以伐宋

冬公伐邾

楚人使宜申來獻捷

十有二月癸丑公會諸侯盟于薄釋宋公

二十有二年春公伐邾取須句

夏宋公衛侯許男滕子伐鄭

秋八月丁未及邾人戰于升陘

冬十有一月己巳朔宋公及楚人戰于泓宋師敗績

二十有三年春齊侯伐宋圍緝

夏五月庚寅宋公茲父卒

秋楚人伐陳

冬十有一月杞子卒

二十有四年春王正月

夏狄伐鄭

秋七月

冬天王出居于鄭

晉侯夷吾卒

二十有五年春王正月丙午衛侯燬滅邢

夏四月癸酉衛侯燬卒

宋蕩伯姬來逆婦

宋殺其大夫

秋楚人圍陳納頓子于頓

葬衛文公

冬十有二月癸亥公會衛子莒慶盟于洮

二十有六年春王正月己未公會莒子衛甯速盟于向
齊人侵我西鄙公追齊師至郿弗及夏齊人伐我北鄙
衛人伐齊

公子遂如楚乞師

秋楚人滅夔以夔子歸

冬楚人伐宋圍縉

公以楚師伐齊取穀公至自伐齊

二十有七年春杞子來朝

夏六月庚寅齊侯昭卒秋八月乙未葬齊孝公

乙巳公子遂帥師入杞

冬楚人陳侯蔡侯鄭伯許男圍宋十有二月甲戌公會

諸侯盟于宋

二十有八年春晉侯侵曹晉侯伐衛

公子買戍衛不卒戍刺之

楚人救衛

三月丙午晉侯入曹執曹伯畀宋人

夏四月己巳晉侯齊師宋師秦師及楚人戰于城濮楚
師敗績楚殺其大夫得臣

衛侯出奔楚

五月癸丑公會晉侯齊侯宋公蔡侯鄭伯衛子晉子盟于

踐土陳侯如會公朝于王所

六月衛侯鄭自楚復歸于衛衛元咺出奔晉

陳侯歟卒

秋杞伯姬來

公子遂如齊

冬公會晉侯齊侯宋公蔡侯鄭伯陳子莒子邾子秦人于溫天王狩于河陽壬申公朝于王所

晉人執衛侯歸之于京師衛元咺自晉復歸于衛

諸侯遂圍許曹伯襄復歸于曹遂會諸侯圍許

二十有九年春介葛盧來

公至自圍許

夏六月會王人晉人宋人齊人陳人蔡人秦人盟于翟
泉

秋大雨雹

冬介葛盧來

三十年春王正月

夏狄侵齊

秋衛殺其大夫元咺及公子瑕衛侯鄭歸于衛

晉人秦人圍鄭

介人侵蕭

冬天王使宰周公來聘公子遂如京師遂如晉

三十有一年春取濟西田

公子遂如晉

夏四月四卜郊不從乃免牲猶三望

秋七月

冬杞伯姬來求婦

狄圍衛十有二月衛遷于帝丘

三十有二年春王正月

夏四月己丑鄭伯捷卒

衛人侵狄秋衛人及狄盟

冬十有二月己卯晉侯重耳卒

三十有三年春王二月秦人入滑

齊侯使國歸父來聘

夏四月辛巳晉人及姜戎敗秦師于殽

癸巳葬晉文公

狄侵齊

公伐邾取訾婁秋公子遂帥師伐邾

晉人敗狄于箕

冬十月公如齊十有二月公至自齊

乙巳公薨于小寢

隕霜不殺草李梅實

晉人陳人鄭人伐許

欽定四庫全書

春秋說卷十二

宋 洪咨夔 撰

文公一

元年春王正月公即位

隱以攝不書即位莊閔僖以繼弑不書即位桓弑立
偃然行即位之禮故書之以成其志聲其惡非正也
公繼世得其正其書即位正矣而有大惡寓焉三年
之通喪不行人君卒哭則除服素冠之刺不特一國

為然而未葬稱子不敢以君自處此禮猶在也故宋
子見於葵丘之會陳子見於溫之會未葬而會固其
罪尚知執子禮未成乎為君惟衛宣公卒未葬惠公
逾年以君禮從諸侯於戰書侯不書子哀戚之心無
毫髮存者公書即位即衛朔之書侯也僖公薨於十
有二月乙巳與正月始吉相去纔兩旬雖逾年改元
稱君有定制而未葬稱子禮何可廢降割方新服喪
未久靈輜在寢觸目摧裂於此時而以吉服行見廟

臨朝之禮人子之心安乎春秋書衛侯晉卒明年衛
侯戰三月葬衛宣公公薨于小寢明年公即位夏四
月丁巳葬我君僖公事辭正相類不孝之罪著矣孝
者百行之本公不知孝於親本不立矣上忽天道下
荒民政威權移而紀綱廢無怪乎其不君也人君奉
元居正視大始而正本可不謹乎

二月癸亥日有食之

日以陰慝干陽故食其食必在合朔乃季秋月朔辰

弗集於房十月之交朔日辛卯詩書記食朔可驗也
而有食於晦者僖公薨於十二月乙巳循環至二月
中當復遇乙巳癸亥為晦明矣若以為食月朔則當
書三月若以為二月朔則日無癸亥其不書晦者朔
重於晦也漢鄭興疏日月交會數應在朔而頃年日
食多在晦先時而合月行疾也君亢急則臣促迫之
象盧植封事晦而月見謂之朓王侯其舒此謂君政
舒緩故日食晦也即此可類求之初政示變尤亟

天王使叔服來會葬

魯更數君前不正其終後不正其始王室未有來會葬者惟僖公以考終文公以適繼改元即位國勢晏然百年之所未見故天王遣使來以榮之

夏四月丁巳葬我君僖公

天王使毛伯來錫公命

慰滿生於觖望之餘則踴躍慶快不自知其美之溢禮之過人情然也公初即位非如韓侯入覲可當叔

旂綏章簾弗錯衡之賜非如文侯修扞可當秬鬯圭
瓊形弓盧矢之賜會葬之使方復錫命之使已屆公
果何以得此於王哉意者魯百餘年間以無嫡嗣召
亂今僖公正其終公正其始王中心喜之故所以寵
異之者加厚雖過於禮猶不失誘而進之好德之意
也王稱天與錫桓公命所書異蓋以此公不知躬拜
嘉於天子之庭以修始朝之禮而使得臣如周虎拜
稽首對揚王休其禮果如是乎

晉侯伐衛

叔孫得臣如京師

衛人伐晉秋公孫敖會晉侯于戚

晉以侯伐衛衛以人伐晉晉不德競而力爭無以使
衛心服故孔達帥師以敵襄公如子玉之敵文公於
城濮也會戚而疆衛田晉抑甚矣人莫患乎血氣之
爭能以義克躬自厚而薄責人則憾平而怨弭何至
黜兵戕民而後快於心哉

冬十月丁未楚世子商臣弑其君頽

春秋弑君三十六世子弑者三楚其首也楚成以嬖
庶撼適禍起閨門綱常墜絕矣易之師曰田有禽利
執言无咎兵出有名而後敵可服也桓文以攘夷尊
夏為伯業其治楚常患無名惟聲其自王之罪為有
名又懼詆譖費辭未易折服而莫之間今此服楚之
機會也臣弑其君凡在官者殺無赦子弑其父凡在
宮者殺無赦殺其人壞其室洿其宮而豬焉子禍中

國所無有以此問罪師出名正楚舉國將頓頽請命
之不暇戢江漢而強中夏扶綱常而立人極功出桓
文之上矣惜乎襄公無邾婁定公瞿然自責之學諸
臣無吾夫子沐浴請討之言有其名而不能執竟使
虎兕出柙長為中國患也

公孫敖如齊

二年春王二月甲子晉侯及秦師戰于彭衙秦師敗績
詢茲黃髮之誓悔過非不切貪人敗類之詩引罪非

不至而彭衙報殺之役猶不能不為血氣動信哉自克之難也前役秦之貪兵是役秦之忿兵皆穆公之尤其書晉侯及者秦以孟明視帥師晉襄公恃其善兵而親禦之重在君也

丁丑作僖公主

虞主用桑練主用栗期練而作栗主禮也公罹大變纔兼旬侈然行即位吉禮無哀感之心甚矣練宜作主而緩於作皆此心之見也親喪人子所自盡而不

知盡他尚何尤

三月乙巳及晉處父盟

禮喪畢以士服見天子已見賜之黻冕圭璧然後歸
是諸侯嗣立朝王猶待除喪况列國相朝乎僖公栗
主未祔晉責公以不朝魯有人焉舉喪禮以告襄公
縱欲以暴戾加人亦少瑟縮矣釋喪修朝違禮取辱
晉以大夫敵公公俛首與盟不敢較魯所以日卑也
往不如反不至盟不公深為魯諱其辱

夏六月公孫敖會宋公陳侯鄭伯晉士縠盟于垂隴
晉襄公暴而詐輕而無禮出師必身在戎行至會盟
則命其臣與諸侯抗軒軒然以坎蛙自尊其意欲卑
列國而國柄已隱然下移矣公孫敖慶父之子即孟
孫氏公即位以來會晉侯盟宋陳鄭三國君皆敖臣
而敵君也履霜堅冰至晉魯之政所以皆在大夫

自十有二月不雨至于秋七月

僖公每時書不雨閔閔望雨之心以日為歲也公

歷時書不雨心不在雨茫乎不知日月之變遷也肅時雨若僭恒暘若公慢於親喪動與禮違不肅孰甚焉急於國事政在臣下僭差孰甚焉此所以常暘而不雨

八月丁卯大事于大廟躋僖公

天下自有至順易行之禮初不待過用其心心過於用則欲為禮乃陷於非禮欲為孝乃淪於不孝此所以不可不知春秋也國之大事在祀親喪未終大事

於周公之廟而躋僖公夫為人後者為之子僖於閔
雖庶兄嘗臣閔矣僖繼閔後豈容升之於上以亂昭
穆之序哉公祭不以禮徒知以升次尊父為孝而不
知納父逆祀乃不孝之大者在廷曾無一言何耶故
夫子曰臧文仲安知禮

冬晉人宋人陳人鄭人伐秦

未報秦施而伐其師其為死君乎襄公要秦敗諸殽
是無父也我見舅氏如母存焉文羸猶在遂亡甥舅

之好以傷母心是無母也事生追往兩失其道尚何問伐國之是非哉故人之

公子遂如齊納幣

莊公執喪未期如齊納幣今僖公之喪再期公子遂如齊納幣視莊為緩矣然五十步筭百步其為未終喪均也夫禮之於人猶酒之有蘖君子以厚小人以薄公之薄可勝數乎出姜始聘以襄仲終歸以襄仲薄之招也

三年春王正月叔孫得臣會晉人宋人陳人衛人鄭人

伐沈沈潰

沈有爵無姓之國後為蔡所滅其微可知晉方嗣伯
不能申世子商臣之罪以討楚而合六國以伐蕞爾
事楚之沈軍聲所至望風逃潰沈雖莫我敢當而舍
豺狼間狐狸勝服何闢伯功之輕重損益哉故人之

夏五月王子虎卒

秦人伐晉

濟河焚舟取王官及郊晉人不出遂自茅津濟封殼
戶而還遂霸西戎用孟明也是舉可謂盛矣而人秦
甚秦也序書者以秦誓作於敗殼之初史記以為封
殼中戶乃誓於軍夫敗殼而誓則彭衙茅津之役雖悔
而不知改封殼而誓則盡悔三役之非穆公為克終
厥德矣當折衷以聖人錄秦誓之意

秋楚人圍江

雨螽于宋

宋微子之後有先王典禮在大水隕石退鷁雨螽皆以天變告於魯以見畏天之意故魯史得而記之他國不盡告也乖戾之氣上干天和災異之徵下應人事螽從天而雨不待孳乳蕃育而衆多之羽雲布風散所至無餘蓋天變之尤異者以為隊而死非矣

冬公如晉十有二月己巳公及晉侯盟

魯前以及處父盟為辱今以及晉侯盟為榮君德不彊朝綱不飭仁賢不信而國空災變不懼而民困顧

區區以大國喜怒親疎為吾榮辱仍歲朝晉晉為改
盟書如書及書至如常時前恥遠忘矣孟子曰仁則
榮不仁則辱今惡辱而居不仁是猶惡濕而居下魯
之君臣盍亦思榮辱不在人而在己乎

晉陽處父帥師伐楚以救江

此用批亢擣虛之術而用之非其道也齊伐鄭圍新
城楚不救鄭而圍許諸侯移兵救許而新城之圍自
解蓋許小而易危圍許乃所以救鄭也楚人圍江晉

師伐楚以救之謂楚必還衛其國則江圍解如楚之
救鄭曾不知情同而勢異江藐乎其小豈能當楚之
久圍堂堂方彊之楚外攻內守卒乘有餘力豈一處
父所能怵而回之名為救江乃所以趣江於滅也春
秋凡救皆善其救之急救之緩事雖不同必皆力合
氣齊乃克有濟未有偏師能救者故桓公之伯救鄭
者三國救邢者亦三國救許者六國救徐者八國不
如是不足以脫人於一髮之危也晉伐沈則合諸國

之兵救江則以偏師行豈有恤小扶危之實心哉書伐楚以救江罪晉也江黃以慕中國取滅悲夫

四年春公至自晉

夏逆婦姜于齊

娶元妃以奉粢盛禮之大者宜書公逆女夫人姜氏至而畧之何耶為魯諱也公以親迎之禮逆婦何所諱諱其成禮於齊也所逆不名其為誰猶及晉處父盟不書公也聲姜僖公之妃成風僖公之母時皆無

惠婦有重姑閨門之盛不待執笄乘栗服脩見姑而
婦禮已成於母家是無其姑也既無其姑何有於廟
見故不至而夫人非所以為夫人也始進不以禮善
後安在宜出姜之不允於魯

狄侵齊

秋楚人滅江

晉侯伐秦

事物先後緩急之序瞭然易見如白黑而不之見私

心蔽之也襄公嗣伯宜以攘寇亂衛中國為急而狄
侵齊楚滅江一置不顧乃親帥師伐甥舅之國夫狄
楚交亂諸夏天下之公怒秦取王官及郊一國之私
怨急一國之私忘天下之公怒比事而觀其貶明
矣

衛侯使甯俞來聘

魯衛兄弟之國聘使之絕幾年矣甯武子來聘講信
修睦有加疇昔春秋所深喜也况其人之賢乎詩言

志賦詩可以觀志帝王盛時教國子必以詩薰陶其正性融釋其邪慮邇之事父遠之事君皆於是取之而專對四方尤以為急公宴武子為賦湛露彤弓魯之僭也諸侯僭天子則大夫僭諸侯相維辟公天子穆穆見於三家之堂者其弊必至於此武子謂不敢干大禮以取戾何其婉歟異時穆叔如晉不拜肆夏文王之三亦此意

冬十有一月壬寅夫人風氏薨

五年春王正月王使榮叔歸含且賄三月辛亥葬我小君成風王使召伯來會葬

魯侯燕喜令妻壽母僖公奉母之謹詩人鼓舞歌詠之然哀姜嫡母成風庶母庶不可以奸嫡猶江之有沱衣之有裳截然定分非私情所能移也公以奉親之私過尊僖妾母為夫人與哀姜並祔天王名器之司歸賜會葬一用夫人之禮以濟其非禮逆天理歟天常王不天矣夫生事之以禮死葬之以禮祭之以

禮無違於禮則為孝子雖齊聖不先父食乃躋僖公
於閔公之上抱衾與裯寔命不猶乃祔成風於哀姜
之列昭穆以亂嫡庶以紊違禮孰甚焉僖公成風而
有靈必不安於非禮周公魯公而有靈必不使非禮
行於吾之廟庭大室屋壞安知非先公意乎春秋書
成風以夫人小君不沒其實而王不稱天視歸贈仲
子其貶尤峻所以叙天彝立人極定萬世法也

夏公孫敖如晉

秦人入都

秋楚人滅六

楚人滅江秦穆公曰同盟滅敢不矜乎楚人滅六及
蓼臧文仲曰臯陶庭堅不祀忽諸是皆悲中國無能
修方伯連帥之職蠻夷得以肆行無道也唐虞及夏
皆萬國商衰會盟津者八百國周封千八百國其後
小不能事大大不能字小陵弱暴寡相為吞噬所存
者無幾而為楚滅者居多使非召陵之盟城濮之戰

則豈無輕重直夜半負之而走耳桓文之伯不可謂無功於中國

冬十月甲申許男業卒

六年春葬許僖公

夏季孫行父如陳秋季孫行父如晉

自季友立僖公於是恩歸季氏政歸季氏友卒行父尚少公子遂公孫敖叔孫得臣分任國事至是行父連聘與國乃其得政之始夫世卿非國之利也以世

卿行乎國政之久自非聖賢未有不挾富貴而擅威
福者彼其初豈懵然於惟辟之義樂於專且僭哉便
儇矯厲者鼓導於其前辟佞善柔者推助於其後此
心無主外境易搖因翕翕相媚之情動沾沾自喜之
意而思所以應人之求以作其趨據物之會以濟其
欲日復一日騎虎勢成而患得患失無所不至矣文
子襲父爵位涉僖文宣成襄五世凡七十餘年妾不
帛馬不粟三思而行知謹畏矣而魯之大柄實以是

而移權移既久習為當然國人尚安知有公室哉故春秋再書季孫行父以見祿去公室之漸

八月乙亥晉侯驩卒冬十月公子遂如晉葬晉襄公

先王之制諸侯之喪士弔大夫送葬晉文公卒魯往會葬不書其人至此始書公子遂如晉葬晉襄公則卿矣子大叔謂文襄之霸君薨大夫弔卿共葬事其實卿共葬事自襄始也春秋所以志變古之端著諸侯僭天子之罪

晉殺其大夫陽處父晉狐射姑出奔狄

陽處父之殺狐射姑之奔傳者皆以為易班漏言之
故非經意也趙賈爭立君而殺也陽子成季之屬黨
於趙氏其主趙孟所欲立必矣趙孟逆公子雍賈季
亦使召公子樂趙孟殺樂而賈季殺處父以黨趙也
處父身為太傅不能正嫡庶之序烏得無罪故稱國
以殺書於葬襄公之後而賈季出奔繼之

閏月不告月猶朝于廟

不告朔曰不告月不告朔則朔日之禮不行不告月
則一月之政皆不舉也在禮天子頒十二月朔於諸
侯諸侯藏之祖廟每朔日朝於廟使大夫南面奉天
子命君北面受而行之比時使有司先告朔此其常
也今以附分之月非月之正故不以其朔告於廟而
是月當行之務亦皆不講公之急於政可知已豈惟
公哉百官有司莫不怠於政也蓋上畏下異上止而
莫之為下順而莫之違所以為蠱魯之君臣上下相

與耽逸養安頹然無一毫趨事赴功之意忽天道棄人時格王命忘民瘼閏不告月周禮遂廢尚朝於廟果何為哉是後積翫成習惰隳相師月朔例不復告故子貢欲去告朔之餼羊

金定巴庫全書

卷十二

欽定四庫全書

經部

春秋說卷十三至十五

詳校官通政使臣夢吉

給事中臣溫常綏覆勘

賸錄監生臣俞光豫

賸錄監生臣劉培

賸錄監生臣南光誠

欽定四庫全書

春秋說卷十三

宋 洪咨夔 撰

文公二

七年春公伐邾 三月甲戌取須句遂城郚

僖嘗伐邾取須句今又伐邾取須句中間須句復為邾得故再伐而取之且城郚為須句之衛也貪於得地不恤其民伐國未至城築隨起方春農時騷然廢東作之務以事外何他政胥怠而兵獨勤耶

夏四月宋公王臣卒宋人殺其大夫

宋成公卒昭公立衆殺其大夫不忌君矣初政若此其何以終大夫不名義不繫其人也

戊子晉人及秦人戰于令狐晉先蔑奔秦

公子雍在秦公子樂在陳皆文公子也襄公卒諸大夫謀舍適幼而立庶長趙盾主雍賈季主樂樂來自陳盾殺諸郿雍之立決矣穆羸抱太子啼于朝盾畏國人以大義逼已乃背逆雍之先蔑而立靈公以禦

秦師潛師敗之於令狐先蔑于是奔秦晉置君不定
秦納之不正故皆人之主兵者盾盾之罪不勝誅矣
謀廢太子一也殺樂二也背雍三也雖釋邪從正許
其知悔而廢置予奪擅國掌中反覆轉移玩君股上
弑立已兆矣蓋亂臣賊子必先有無君之心而後動
于惡

狄侵我西鄙

邢衛溫鄭齊晉以及王室皆被狄患獨未及我耳今

侵我西鄙無忌憚甚矣國無政朝無人元氣索然客邪空入春秋深憂之

秋八月公會諸侯晉大夫盟于扈

翟泉之盟僖公與晉狐偃及列國之大夫會恥不書公今盟于扈晉趙盾主之公與大夫會而不恥者有諸侯以分其恥也齊桓之伯未嘗以大夫會諸侯不以大夫敵諸侯也不以大夫敵諸侯則君臣之分嚴而已自尊晉文之伯以大夫會諸侯所以尊已而卑

人也侯均一等大夫可以敵列國之君則亦可以敵
晉君矣豈別嫌明微之道哉靈公初立幼不能君盾
會八國之君如晉君權擅於內威行於外諸侯何敢
較而大夫僭君靈公之位贅焉耳况以擁戴之恩保
養之力待君如子姓宜乎威福大柄之移生殺廢置
皆在其手靈公之命寄焉爾諸侯不序大夫不名春秋
所以大正本也

冬徐伐莒公孫敖如莒涖盟

徐取舒稱人伐莒稱國莒夏而舒夷也莒請盟于魯
敖往泣盟以為其聲援似知保小之義而敖志在于
聲已託公營私其意隱矣

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

諸侯不稟王命私會私盟政不在天子矣大夫自相

會盟雖有國事前未之見政不在諸侯矣遂專于晉
盾專于晉會盟于扈如兩君不惟兆惡視夷皋之禍
而三家專魯六卿分晉其來有漸矣

乙酉公子遂會雒戎盟于暴

初平王東遷辛有適伊川見被髮而祭于野者曰此
其戎乎已而秦晉遷陸渾之戎于伊川其後楚子伐
陸渾之戎遂至于雒伊雒之戎蓋陸渾族類也王帛
未通何可以禮接襄仲以盟趙盾而出就與雒戎盟

不稟君命而引未嘗內通之戎以交中國豈所謂大
夫出疆安國家利社稷者乎夫徙戎于雒秦晉之罪
也進戎同盟襄仲之罪也故再書公子遂以著生事
竟外之戒

公孫敖如京師不至而復丙戌奔莒

敖如京師弔周喪遂奔莒以從聲已其縱人慾殺天
倫而廢君命罪不可赦已公得無罪乎天王崩當弔
嗣王立當朝既不躬往特籍一介之使通事周之誠

而行人之職曾不謹擇顧使已試無狀之教將命中
道而反以幣出奔不恭孰甚焉書如京師不至罪累
公也

螽

宋人殺其大夫司馬宋司城來奔

大國三卿皆命於天子宋之有六卿私且僭也六卿
皆公族固不失親睦之意而同姓之卿無異姓之卿
參錯相維於其間君臣之情親而不尊相狎相疑之

念起相謀相屠之禍作此八王所以亂晉也昭公之立以羣公子分據國卿而欲去之樂豫遂舍司馬以遜公子印雖能和公室於一時而怨寔深故華樂皇三族挾襄夫人以攻公黨司馬印握節以死司城蕩意諸來奔效節府人而出印意諸黨無道之昭而不能正不為無罪而握節效節於搶攘轢轔之中能守官矣故各以官書其人不足見故泯其名所以勸人臣之不失職戒人臣之不知道也

九年春毛伯來求金

武氏子求賻毛伯求金不書天王使來諒闇也求賻求金皆在王崩之後王室不足於葬故有求天子無求而有求固非天王之法度宮車晏駕臣子大痛舉天下而葬一人顧使不足於葬有求於我誰之罪耶夫人姜氏如齊

二月叔孫得臣如京師卒葬襄王

前是襄王嘗遣使會僖公之葬成風之喪又歸含贈

遣使會葬其於魯恩禮有過無不及而公顧薄之王崩不親弔使教如京師不至葬不親會又使得臣如京師與公子遂如晉葬襄公同事君之禮如是乎

晉人殺其大夫先都

三月夫人姜氏至自齊

夫人出未嘗至今以歸寧至異之也何異爾禮夫人始歸當至公逆婦姜于齊而不至廢廟見之禮矣如齊而返告至于廟如始歸何前之倨後之恭是以異

之也詩曰于以采蘩于沼于沚于以用之公侯之事
夫人之職莫大於奉宗廟之祭祀而公急於禮夫人
亦廢禮歸魯六年因如齊始廟見采蘩之義要在乎
晉人殺其大夫士縠及箕鄭父

靈公幼晉政歸趙盾人心不能平也盾於是殺大夫
之不附己者先都士縠箕鄭父所以死也大抵權臣
專國之始其心何能自安盼盼然恐人之議已鰥鰥
然慮人之間已睽睽然懼人之負己故必先鋟不附

已者以立威而後國人屏氣拱手惟所為而莫之非
莫之違權始一矣指鹿之間仗馬之斥黃河之投鸚
鵡之戮皆此術也春秋憂之故以人斥盾

楚人伐鄭公子遂會晉人宋人衛人許人救鄭

昔荆伐鄭公會齊人宋人救鄭楚師夜遁今楚人伐
鄭魯會四國同救鄭不及宜所書有異辭而書救如
一者與其有救災恤危之心而不以事之濟否論也
夫然後知春秋不論迹而論心

夏狄侵齊

秋八月曹伯襄卒

九月癸酉地震

冬楚子使椒來聘

楚始來聘進荆稱人今再來聘子其君名其大夫一
以中國之禮待之果寢而進之耶抑憂其方強未艾
耶魯為中國之樞諸侯之表楚欲網羅諸侯控搏中
國不可以不先得魯其所以親魯者非懼魯也魯我

從則他國不患其不我從也齊桓方卒晉文未興楚與魯最親伐齊之師我能左右之而諸侯遂皆為楚役矣文襄伯後中絕不通靈公不足以嗣世業楚窺其不在諸侯北方可圖復以好交我非牢籠我耶惠伯徒譏越椒執幣之傲而不察其實有輕魯之心况魯何所取重於楚而來聘耶春秋一以中國之禮待之信乎為中國憂也

秦人來歸僖公成風之襚

珠玉曰含衣服曰襚成風薨再月而王歸含為已晚
葬累年而秦方歸襚抑何緩之甚耶秦未嘗聘魯假
歸襚而來通蓋為僖公有翟泉及溫盟會之好而襚
其庶母也觀燕喜之詩僖公奉母為甚至然未嘗以
夫人之禮過尊之其尊成風為小君而並祔則文公
之過也秦人歸襚曰僖公成風而不以夫人書僖公
之心白矣

葬曹共公

十年春王三月辛卯臧孫辰卒

夏秦伐晉

晉人及姜戎敗秦于殽國而不人志其以貪取敗也
令狐之役晉實背秦而秦納公子雍非其正亦宜自
反顧猶修怨於三年之後所以國而不人也夫穆公
一知悔則序秦誓於帝王之末康公一不知悔則春
秋從而狄之是非得失判於操存舍亡之間曾不能
以一髮可不懼哉

楚殺其大夫宜申

楚穆王商臣負天下大惡夫人得而討之子西為成
王任事之臣而蒙再生之造奔告方伯連帥請致弑
父與君之討可也而身事商臣者累年始與子家謀
弑之是以亂易亂非討逆也故稱國以殺然楚大夫
無能以官見而宜申首以專殺書亦榮矣

自正月不雨至于秋七月

及蘇子盟于女栗

蔡伯來無王命而私交于我罪也蘇子以王卿士私
與我相為要結罪又甚焉魯與有罪故不書公
冬狄侵宋

楚子蔡侯次于厥貉

凡書次或救或伐未有不言其所為其不言所為則
遊觀之所次如公次于滑之類是也楚子弑立己十
年矣天王不誅方伯不討滅江滅六蓼無不如意陳
鄭宋蔡又皆從之于是次厥貉為遊樂遂田于孟諸

其黨惡之甚者則蔡莊公也此次何關於世道而謹書之蓋以示亂臣賊子之得志而晉之伯業衰矣

十有一年春楚子伐麇

夏叔仲彭生會晉郤缺于承筐

是會為謀諸侯之從楚者楚負天下大惡晉不能聲罪致討失此機會肆無忌憚陳蔡宋鄭皆從之田麋恥而逃極力伐之不少貸其磨牙中夏未已也郤缺乃施施為承筐之會與魯謀之魯何足與謀哉晉不

在諸侯誠不逃范山之料

秋曹伯來朝

公子遂如宋

狄侵齊冬十月甲午叔孫得臣敗狄于鹹

伯道衰而楚人與狄人縱橫四出莫能制狄侵宋未已又侵齊又向于魯乘勝而來震蕩飄忽叔孫得臣設謀敗之雖敗之非其正而與晉人敗狄于箕同一快也狄自是懲父不復向魯矣

十有二年春正月鄭伯來奔

不名必有非其罪者經曰伯傳可信乎

按左

傳謂鄭太子以夫鍾與鄭共來奔公以諸侯逆之故書曰鄭伯是說也先儒多疑之趙匡云諸侯嗣位未踰年尚稱子豈有身未即位以邑出奔而稱鄭伯之理且鄭忽曹羈莒展皆已即位及其出奔猶但稱名况未嗣位者乎劉敞云鄭太子來奔而稱鄭伯若實鄭伯來奔又何以辨哉且魯以諸侯逆之春秋遂沒其專土叛君之罪反謂之諸侯而尊之則何以稱不登叛人哉較原文辨尤明晰附錄于此

杞伯來朝

杞改稱伯時王所復也王之黜陟其猶行於杞乎

二月庚子子叔姬卒

叔姬稱子猶先君之子稱公子也

夏楚人闢巢

秋滕子來朝

秦伯使術來聘

魯方怠於政而三數年間楚來聘秦歸隧曹杞滕來朝秦又來聘果何以得此於人哉有駁之詩曰君子有穀貽孫子于胥樂兮僖公在位三十餘年輔伯之

外未嘗興爭城爭地之兵結怨於鄰國公嗣立十餘年亦未嘗輕動一兵所謂善道貽子孫者猶在而人猶知所慕也秦方歸隧復來聘願徼福于周公魯公以事曾待我加厚矣以穆公之賢不能以爵見其臣不能以名見而康公書伯術書名豈非講信修睦繼好息民春秋所深喜歟

冬十有二月戊午晉人秦人戰于河曲

晉人及秦人戰于令狐曲在晉也故書及秦伐晉曲

在秦也故國秦晉人秦人戰于河曲兩皆曲也晉從
秦師秦薄晉軍交綏而退未懲而遁不戰言戰何哉
探其稔惡肆忿之心而著之也聖人用皇極之法權
衡斯世好惡黨偏一無所徇惟其平而已晉舍所當
立逆雍而背之晉之罪也晉立君已得其正而秦伐
之秦之罪也晉引置君不定之咎秦省納雍非正之
愆則仇怨可忘宿好可繼何至於復戰今戰河曲不
容專罪一國兩皆人之其罪均矣此猶積年不決之

訟均蔽其罪而後定故終康公之世不復書交兵
季孫行父帥師城諸及鄆

城築未有書帥師者城兩邑而行父用軍法總大衆
以從役兵權墮其手矣凡權臣非得兵權不能專

欽定四庫全書

春秋說卷十四

宋 洪咨夔 撰

文公三

十有三年春王正月

夏五月壬午陳侯朔卒

邾子蘧蔭卒

邾文公嘗用鄖子于社不仁甚矣遷繹而卒君子曰知命命豈不仁者所能知哉特將死其言適善耳

自正月不雨至于秋七月

上智與下愚不移中人之性苟知謹畏以自策勵則愚柔可進也公二年自十二月不雨至于秋七月十年自正月不雨至于秋七月令又自正月不雨至于秋七月其無志于民始終如一日非不移之愚乎帝出乎震齊乎巽相見乎離致役乎坤凡物春生夏長以及夏秋之交方苞襄發日夜趨新之功至此而極不雨始于發育之初終於秀實之際則無一得遂其

生矣此所以皆書至于秋七月也與幽風首以七月
流火意同

大室屋壞

王入大室裸清廟中央之室也魯用天子禮樂故周
公大廟中央之室亦稱大室徂徠之松新甫之栢豈
盡濯濯無可斷度尋尺者而大室之屋以不修而壞
簡宗廟可知且逆祀僖公並祔成風皆魯禮所未有
禘祫之時合羣廟食于太祖昭穆失序嫡妾亂紀祖

禰之靈其能安乎室壞所以大訓魯也

冬公如晉衛侯會公于沓

狄侵衛

十有二月己丑公及晉侯盟公還自晉鄭伯會公于棐
衛鄭邀公于中途介之以平于晉未幾同盟于新城
此非晉謀慮所及亦非公智力所能濟也久動則思
靜久危則思安衛鄭之從楚雖久而蛇蝮之與居鬼
蜮之與交職貢事役歲不堪命昔晉楚交爭衛鄭故

楚猶以列國待之晉不與爭則楚以臣僕命兩國安能不動從伯之思乎魯事晉無間言藉以請平而遂平中其機也夫機會之來庸人可以就功名公一出三為諸侯所榮宜哉

十有四年春王正月公至自晉

邾人伐我南鄙叔彭生帥師伐邾

邾文公卒魯往吊不敬故有是伐邾小于魯魯常易之然觀定公嗣位以一言郤八百乘之晉國雖小其

可易哉

夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸酉

同盟于新城

旄丘責不修方伯連率之職下泉思明王賢伯諸侯
欲得所恃以為安同是心也使上有明天子下有賢
方伯孰肯甘心異國之從哉楚商臣弑立中國不能
討而日橫厥貉之次驅陳蔡宋鄭以田孟諸至以僕

御待列國之君使受役于司馬其辱不能堪也觀鄭
穆會公于棐請平于晉而賦鴻雁苦夷樂華情可見
矣新城同盟者八國非有所迫而從非有所要而集
歡然其歛不減桓公之在幽同舟遇風之勢也趙盾
能于是時相靈公以主牛耳伯業可興而上敵諸侯
不知此身之為大夫無其君矣豫之四曰由豫大有
得勿疑明盍簪五則曰貞疾恒不死權在剛正之大
臣雖足以致人心之樂從而君猶患于偏況矛盾乎

秋七月有星孛入于北斗

斗為天之喉舌七政之樞機乾象莫尊焉彗孛掃入環域中非常之變也周內史叔服有宋齊晉之占豈非謂魁主海岱以東北乎夫善言天者驗於人故當占其所感不當徒占其所應是歲之春頃王崩周公聞與王孫蘇爭政不赴告於列國諸侯亦一切不弔喪不會葬是天下無一臣子矣逆氣上干有是徵豈待占驗于七年之後哉

公至自會

晉人納捷菑于邾弗克納

晉以諸侯之師納捷菑邾人辭曰齊出羆且長乃還鑑於前事也邾元妃齊姜生定公猶晉穆羸生靈公適當嗣立晉既立靈公秦納公子雍而晉拒之使秦能悔所納之非正何至甥舅之國暴兵交惡連年而不已今納庶子不正猶秦其可效尤乎聞邾人辭順斂師去之勇於徙義矣左氏以為趙盾公羊以為郤

缺而經書晉人則是國人皆欲還非止盾缺也弗克納即易之所謂弗克攻

九月甲申公孫敖卒于齊

齊公子商人弑其君舍

齊桓公鵠原一念之烈羣公子爭立自相魚肉不盡不止無虧首立見殺而孝公立孝公弟潘殺孝公子而立是為昭公昭公弟商人殺昭公子而立是為懿公懿公尋為歟職所殺報施若符節然惟惠公元不

急于得國而國歸之子孫享之不耕穫不蓄金則利
有攸往天命其可以有心圖哉羣公子之圖國商人
為最慘驟施于國而多聚士以傾舍元曰爾求之久
矣其用心國人所知也舍未踰年稱君蓋不稱君則
不可加以弑則商人之罪不白而心術隱矣其曰公
子見桓公諸子之禍至今猶未息也

宋子哀來奔

高哀不食汚君之祿辭卿而出奔叔肸不食篡君之

祿織履而不去同姓異姓之別也其皆清矣乎故皆
書字

冬單伯如齊齊人執單伯齊人執子叔姬

舍既弑單伯請其母昭姬于齊商人并執之國人莫
或非者同惡相濟故再書齊人

十有五年春季孫行父如晉

三月宋司馬華孫來盟

晉有大傅魯有宗伯皆古官不書而宋司馬獨著宋

以卿兼大夫他國則以大夫兼卿舉其重者書且示
先代之後設官視他國為有異也昭公無道欲去羣
公子羣公子嘗為先發制人之謀鮑又禮于國人以
傾之勢如癟之將潰堤之垂決人人有懼心故子哀
來奔華孫來盟來奔者見幾而違之得去就之義來
盟者以使他國便道私盟於我以自託也鶠為同姓
之卿不知為國謀以靖方來之變而外交以保身且
暴揚先君之惡于辭宴之頃忠孝兩失之書曰司馬

華孫所以著其忘君暴祖之罪

夏曹伯來朝

齊人歸公孫敖之喪

齊懿弑其君魯甥之舍執其母子叔姬以元惡大憝
結深怨于我安知無沐浴請討之臣於是公孫敖
之喪歸蓋無瑕者可戮人敖慶父之子也慶父弑兩
君魯不能正其罪而教以孟孫氏任事於國齊之弑
猶魯之弑齊當討則魯之孟孫亦當討以是敖我鉗

三桓之口使不敢議其後也不然何所慕於魯何所愛于教而歸其喪哉書曰齊人歸教之喪而不曰教之喪歸自齊可見齊之用意

六月辛丑朔日有食之鼓用牲于社

用莊公例也在廷無古學惟近例之循而不知其非後世禮之不古類坐此

單伯至自齊

禦寒莫如重裘止謗莫如自修單伯為魯請叔姬于

齊齊為無道誣單伯以淫併叔姬執之此心無瑕雖
不汲汲於自辨數而浮雲蔽日雲散日明齊無辭以
歸之從容告至無愧色無慍容可不謂賢乎否則安
能免行有不慊之餒

晉郤缺帥師伐蔡戊申入蔡

秋齊人侵我西鄙

季孫行父如晉

冬十有一月諸侯盟于扈

宰天下如庖丁解牛必中肯綮之會則奏刀游刃恢
乎有餘地天下之有犯大戒負大惡伯主能暴白其
罪與衆棄之諸侯誰敢不服不待問蜂薙而搏蟻虱
也蔡不與新城之盟固當討齊弑其君視蔡罪為孰
重大合宋衛蔡陳鄭曹許七國之君子扈以尋新城
之盟且謀伐齊乃取賂而還夫弑立之賊夫人可討
鼓行直前罪人斯得豈非復伯之機會而盾不之乘
晉政其荒矣盾心其悖矣昔宋督弑君齊嘗會諸侯

于稷為賂故立華氏以成宋亂衛朔出奔齊晉會諸侯逆王命納之亦相與俘寶玉以歸彼亂臣賊子可以賂免則何所懼而戢此齊所以有無知之禍也齊有大罪晉取賂而縱之未幾靈公亦弑得非身為賊亂之勸而授之刃乎是盟晉黨惡諸侯同其惡故不序

十有二月齊人來歸子叔姬齊侯侵我西鄙遂伐曹入其郛

伯禽封于魯三年報政周公曰魯後世其北面事齊國勢之弱非一日之故矣齊弑我甥不敢問單伯請子叔姬乃從而執辱之執我女兄弟不敢校行父告于晉請釋之不惟不釋又我侵侵不敢敵行父復告于晉會諸侯盟扈以謀齊而公不敢與齊雖以叔姬來歸侵師又繼至且伐我來朝之曹入其郛齊暴如虎魯弱于鼠魯之畏齊不敢一動手搖足但知以隱忍為國而齊之加無禮于我日甚焉國勢厭厭矣此

無他不能自強也無怠無荒四裔可使來王我方怠
荒則與國視之蔑如尚何怪哉

十有六年春季孫行父會齊侯于陽穀齊侯弗及盟

聖人之待惡人婉而有直體觀陽虎吾將仕矣之對
可知矣陽穀之會齊侯方侈然自尊安肯下與吾大
夫盟請俟公疾間可以折行父軒軒之氣矣書曰弗
及婉辭也春秋于季氏事多婉

夏五月公四不視朔

周室雖微猶能班朔於諸侯如盛時之制諸侯受于廟而行之所以若天時恭王命而繫人心也公先是閏不告月猶朝于廟今則託疾不視朔者四亦不復朝于廟其後遂月不視朔以為常忽天慢王而棄民矣夫一歲之重在正一月之重在朔一日之重在朝正以布治勤于正則一歲之事舉朔以讀法勤于朔則一月之事舉朝以聽政勤于朝則一日之事舉不惟事之舉也上能勤則一國之柄皆由己出上不能

勤居養移而志氣沮嗜慾多而精神散習偷養安而四肢百骸頽乎不立于是國柄潛移于下命寄權臣之手矣公厭政若此宜公家日削私室日強也後之人臣有欲移人國柄者故有以天下為桎梏之論六月戊辰公子遂及齊侯盟于鄆丘

季孫行父會齊侯于陽穀請盟不肯不以君盟大夫也已而公使襄仲納賂于齊侯遂與大夫為鄆丘之盟人心之動于利如此哉虎不受餌孰得而寃龍可

卷而擾則無異于犬豕牛羊晉方謀齊以賄而却齊
方外魯以賂而親國不以義為利而以利為利上下
交征未有不危者二君之禍可驗已

秋八月辛未夫人姜氏薨毀泉臺

魯人以泉宮蛇妖出而聲姜薨故壞之夫妖由人興
公上不畏天下不恤民中不念祖宗氣惰事毀將無
以善其嗣故妖孽生之豈泉臺之咎哉人囿于天地
之間有生必有死夫人之薨歸咎于臺可以勿毀而

毀之不知命也

楚人秦人巴人滅庸

楚滅國多矣庸之滅以秦巴參之濟惡也庸在江漢之南文王之化武王之誓蓋習聞而熟傳之雖處南蠻豈甘心事弑父弑君之賊故帥羣蠻以叛楚

按楚穆沒

于魯文十一年是歲楚莊王立三年矣得國以正非有他故原文所云殊為失考

楚方大饑

謀徙險以避其鋒屢戰屢北且不能支使非秦巴黨惡為之助庸未滅也滅庸而楚益張二國之罪焉逃

冬十有一月宋人弑其君杵臼

昭公欲去羣公子虧睦族之仁得罪于君祖母闕事
親之孝固人心所不與也君雖無道臣子可將乎齊
公子商人驟施于國而多聚士盡其家貸于公有司
以繼之所以傾舍而卒弑舍宋公子鮑禮于國人貸
饑饋老事材恤親而數六卿所以傾杵臼也而卒弑
杵臼其事大同舍弑以商人書杵臼弑不以鮑書襄
夫人使師甸攻殺之罪不專于鮑也然國人之饑者

利其貸老者利其饋材者利其事親者利其恤六卿
莫不利其數而昭公見傾文公立國人何所逃罪乎
善乎晏子之言曰惟禮可以已之在禮家施不及國
十有七年春晉人衛人陳人鄭人伐宋

夏四月癸亥葬我小君聲姜

齊侯伐我西鄙六月癸未公及齊侯盟于穀

魯辱于齊君臣頽墮瑟縮不敢動惟一意求與之平
而前侵後伐其暴逾甚齊固多行不義必自斃魯抑

畏首畏尾身其餘幾哉國勢之強弱不同皆有弑逆之禍以此見沈潛剛克高明柔克之難

諸侯會于扈

宋人執其君晉荀林父帥三國討之已而又合諸侯于扈欲平宋亂名正言順大義白矣而伐皆人會不序諸侯不勇于為義也孟子之論氣是集義所生者非義襲而取之行有不慊于心則餒矣晉知命義大戒之不可犯故有討宋平宋之舉是義蓋襲而取之

非平日集義之功有以養其氣宜餒而易沮也昭公之弑主之者襄夫人傾之者公子鮑殺之者荀師六卿則皆與聞其謀晉誠以義討之鮑不當立也苟以立鮑為足以定宋則是勸公族之傾其上助人臣之仇其君豈所以訓乎未幾齊亦弑魯亦弑莒亦弑而晉亦弑亂臣賊子窺諸侯之無能勇于義而動也故伐宋會扈深致其貶

秋公至自穀

冬公子遂如齊

十有八年春王二月丁丑公薨于臺下

薨于路寢正也小寢已非其正臺下果何地乎成王平生學問涵養之功至顧命而盡見蓋其理明氣定心靜神夷死生大變莫能移之利貞誠之復也公生而怠忽慢弛放心莫收安能正而薨哉

秦伯薨卒

夏五月戊戌齊人弑其君商人

以利合者利窮則散商人急于得國故驟施以擾國人國人利其施莫以弑其君孰其君之母為非也然驟施豈可常哉前日之施予不續後來之觖望方深國人之心亦以是失之故初侵我稱齊人再侵與伐稱齊侯可見人心以利窮而散矣歟職共弑歸舍爵而行知國人共快其君之弑而無所畏也夫利商人而黨惡者齊人惡商人而縱盜者亦齊人君以此始亦以此終可為不義求國者之鑑

六月癸酉葬我君文公秋公子遂叔孫得臣如齊冬十

月子卒

成風私事季反而屬其子於是僖公立敬肅私事襄仲而屬其子於是宣公立襄仲襲季友之迹而動也赤立未踰年見弑宜與齊商人弑其君同科不書君而書子不書薨而書卒為魯隱也襄仲謀弑不之晉而之齊齊人弑立固幸同惡之相濟晉趙盾已動無君之心不暇恤也弑前書叔孫得臣介遂如齊弑後

書季孫行父如齊叔季興聞其故所當誅者非特一
襄仲也春秋雖為魯隱固有微而顯盡而不污者存
所以使亂臣賊子之黨同懼

夫人姜氏歸于齊

襄仲連殺夫人之二子以絕其本根哭而呼天大歸
于齊非特為保身計且潔其身以不辱先君也齊商
人弑君而立併誣其君之母叔姬以淫而執之雖屢
請得歸所傷多矣赤方弑而夫人亟去之豈非有所

懲乎然觀燕燕衛莊姜送歸妾有曰瞻望弗及實勞我心又曰先君之恩以勗寡人其志寧死于衛不歸于齊則夫人之歸春秋特哀其非得已未許其歸之正也故薨葬皆不復見

季孫行父如齊

莒弑其君庶其

一年而弑君者三國王教不行天常不立比屋可誅也莒僕憑藉國人之怒弑紀公以其寶玉來奔宜如

楚商臣許止書世子而舉國以弑是弑君者非特世子在莒朝者皆亂臣賊子也

欽定四庫全書

春秋說卷十五

宋 洪咨夔 撰

宣公一

元年春王正月公即位

人君莫大乎體元而居正位得其正之難也位得其正上無愧於天中無愧於祖宗下無愧於民而後可以行即位之禮蓋天命不可以智力求天位不可以權術干而受之必以道苟一毫有愧於中則無以入

宗廟見祖禰御朝廷臨臣民矣公爲文公庶子以母
敬羸私事襄仲殺兩嫡而立之其果以道乎苟其道
舜受堯之天下不以為泰非其道簞食豆羹不可受
於人簞食豆羹之得失輕重與受天下均非其道猶
惕然動於心赧然見於顏面有寧貿貿以死不食嗟
來者而非道得國顧不知恥改元即位侈然如常禮
同氣之肝腦塗地適母之號呼徹天以是而行五始
之禮心安乎哉冒天下之大惡以爲榮負天下之大

繆以為安故書法與桓公同

公子遂如齊逆女三月遂以夫人婦姜至自齊

鑽燧改火期可已矣文公薨於去年二月公逆婦於今三月短喪用期制也魯喪紀之壞非一君而娶未有若此其亟者畏齊深則奉之勤倚齊重則求之切尚何暇顧禮哉况齊弑吾甥魯不問魯弑彼甥齊不責氣類孚合猜疑兩忘故襄仲以弑君大惡逆女於出姜父母之國恬然不以為怪也妾母為姑婦姜所

以不氏

夏季孫行父如齊

晉放其大夫胥甲父于衛

故放驪兜放蔡叔之放也秦晉戰於河曲臾駢欲薄
諸河胥甲趙穿當軍門呼而止未為大罪也况相去
八年豈應宿愆之猶在逸罰之復行是蓋權臣之私
惡殺之則無名留之則有憾故托放以屏遠之放而
不失其大夫意必有當官而行忤權要者

公會齊侯于平州公子遂如齊六月齊人取濟西田桓與公立皆非正桓壻於齊而強敢與齊抗公壻於齊而弱常為齊刦蓋篡弑之君與盟會則免于討魯一日殺二嫡皆齊出安知其不孰何我國人之情盖甚洶洶也遂與季孫急於借齊鎮浮而弭變結轍往來窘狀畢露苟得齊侯與為平州之會以壓危疑何愛濟西田之賂哉書取所以著齊之刦魯見利而忘義

秋邾子來朝

楚子鄭人侵陳遂侵宋晉趙盾帥師救陳宋公陳侯衛侯曹伯會晉師于棐林伐鄭

爵楚而人鄭鄭輔楚人以躡中國也楚得鄭遂侵陳宋而晉獨救陳陳急而宋緩也宋陳衛曹之君會晉師伐鄭晉師次于棐林俟諸侯之至而後伐也救陳者惟晉伐鄭必俟諸侯之集何哉義不足以服人必衆而後濟也盾為政於晉惟利是求齊弑其君舍晉

嘗合諸侯謀之取賂而還宋弑其君杵臼晉嘗合諸侯伐之復取賂而還篡弑大惡皆以賂免三綱五常掃地殆盡方伯連帥所以奉王命而行天討疑不如是此諸侯所以解體也方鄭請平之時固有舍楚即晉之志苟行事能服其心何至颺去之亟徇黨惡之利忘討賊之義肩之無君朕迹已見故鄭知其不足事而去之觀子家使執訊之辭豈僥倖所能屈哉中有所懼外有所疑宜必俟四國之集而後進也善救

故書盾大夫不可以受諸侯殊會之禮故不書盾

冬晉趙穿帥師侵崇

臨衝閑閑崇墉言言臨衝茀茀崇墉仡仡文王奉天
命以討有罪之崇也晉欲求成於秦而侵其與國之
崇以為謾崇何罪乎穿能知前日薄秦於河之非勇
而不知今日謾秦於崇之非義急於兵柄之入手將
動於惡天君亂矣

晉人宋人伐鄭

晉討鄭之從楚固似有名而挾篡君以同伐其何以令列國見哉宜不競於楚而人之

二年春王二月壬子宋華元帥師及鄭公子歸生帥師戰于大棘宋師敗績獲宋華元

春秋未有彼此皆書帥師者而華元歸生並書帥師何哉元乃前是弑君之黨歸生即後來弑君之賊皆專其國兵者也鄭受命於楚以伐宋疑曲在鄭而宋主兵宋文以篡得國不討已幸而一歲從晉伐鄭者

再固鄭師之招也晉敗秦師於殽獲三將不書蓋明
諸子猶可望桑榆之收元非將材一跌遂不復振徒
包棄甲復來之羞故書獲以戒命將之非其人

秦師伐晉

夏晉人宋人衛人陳人侵鄭

悼公三駕而楚莫與爭君臣同心而國勢強也鄭背
晉即楚晉師三出卒無以服鄭而攘楚君臣離心而
國勢弱也是時靈公有去肩之志宣子有弒靈之心

睽睽相視謀為先發攘外匡內亦慢焉而已故初伐鄭則四國之君會再伐鄭則惟宋人從今侵鄭則為禦秦而出楚鬪椒救鄭盾亟設辭去之內難將作也劉裕伐秦踉蹌而歸者以此

秋九月乙丑晉趙盾弑其君夷皋

兵論渠魁獄論首惡弑隱公者羽父不可歸罪於窩氏弑閔公者共仲不可歸罪於卜齕晉弑其君夷皋太史書曰趙盾春秋因之亦書曰趙盾而傳者乃以

為趙穿且謂董狐以亡不越竟反不討賊為荀罪夫
子以為法受惡越境乃免為荀辭皆非事實也荀無
君之心久矣靈公之立非其本志君臣之猜隙已深
而荀以擁翼為己恩盡專晉政威福已出新城之盟
棐林之會偃然以大夫敵列國之君而不忌桃園肆
惡與穿素有成謀特至此而動爾穿攻公而荀出奔
二人相為表裏以嫁其迹發縱不可掩也穿為荀弑
荀為穿距荀首穿從坦然明白使其越竟亦豈能逭

弑君之罪哉夫造惡以用意為主蔽罪以主謀為重
宜乎春秋成而亂臣賊子懼

冬十月乙亥天王崩

三年春王正月郊牛之口傷改卜牛牛死乃不郊猶三
望

此用越繩之禮天意弗之許也魯郊之僭久矣王崩
而郊尤非禮之中非禮牛傷且死以示警天可違乎
僖公免牲猶三望牲雖免郊禮未盡廢今不郊則郊

禮盡廢矣畏威之心動悔過之念生聖人為之深喜
望祭可已不已又越紳行之則所譏重於僖

葬匡王

項王之喪王室不赴告諸侯不弔葬螻蟻而無君乎
匡王崩四月而葬無同軌之可待故殺禮而縮期公
動多失禮猶以葬王書是亦鄙塞中一點之明也

楚子伐陸渾之戎

楚戎相攻何足算陸渾之戎則秦晉遷於伊川者也

伊洛近在王畿楚子伐戎至雒觀兵問鼎勢良迫矣

剥牀及膚春秋安得不懼

夏楚人侵鄭

秋赤狄侵齊

戎一也有戎有山戎有茅戎狄一也有狄有赤狄有白狄末朽而蠹肉敗而蛆明王賢伯之不作綱常倫數政刑廢墜故蠹爾小醜皆足以為吾天下害特謹而書之

宋師圍曹

篡弑之君自知名義所不貸必藉大刑大兵以立威而鉗國人之口桔與國之手宋鮑之篡既殺母弟及昭公子而盡逐武穆之族又見曹弱遽興大衆圍其國心危而示整氣索而示彊使莫我敢窺也小人之情類如此

冬十月丙戌鄭伯蘭卒葬鄭穆公

四年春王正月公及齊侯平莒及鄰莒人不肯公伐莒

取向

權與物均而生衡衡平也惟天下之至平能平天下
之不平未有己不平而能平人者也公以篡立不平
甚矣乃欲挾齊強平莒邾之怨宜莒人之不從也莒
不從而伐之取向始以義出終以利歸本心見矣胡
不觀虞芮質厥成文王蹶厥生乎

秦伯稽卒

夏六月乙酉鄭公子歸生弑其君夷

按左氏子公染指龜鼎公怒欲殺之子公與子家謀先子家曰畜老猶憚殺之况君乎反譖子家子家懼而從之夏弑靈公書曰鄭公子歸生弑其君夷權不足也左氏喜奇而誣類如此經書趙盾弑其君而傳謂趙穿實弑盾以不越竟而受惡經書歸生弑其君而傳謂子公實弑歸生以權不足而蒙罪是首謀為輕黨從為重也經如造化生殺萬物明白簡直無一毫迂曲之意傳則剪綵刻楮以為工失其本真矣雖

曰春秋誅黨惡安有舍首惡不誅而嫁滔天大罪於其黨乎弑夷實歸生首惡非懼譖而黨惡無疑矣其後子家卒鄭人討幽公之亂斬子家之棺而逐其族討首惡也學者無疑經信傳而巧為辭

赤狄侵齊

秋公如齊公至自齊

冬楚子伐鄭

五年春公如齊夏公至自齊秋九月齊高固來逆子叔

姬

魯姬下嫁宋蕩蕩慶已辱矣高固強委禽而婚叔姬辱又甚焉大凡負罪重者畏於人必深求安急者依於人必切畏人如碩鼠依人如窮猿則人得以制其命矣公初弑立實謀於齊既立恐大國有負恩之疑則娶齊以自親既娶矣慮他國有問罪之舉則賂齊以同會齊有德色魯有懼心連歲如齊惟恐不當其意此高固所以請止公扼吭拊背而求婚也受刲而

婚藉婚而脫不以卑子女辱祖禰為羞飲至于廟如
平時固秋以親迎挾叔姬而去冬以反馬擁叔姬而
來嘻嘻然受之晏晏然行之公之無恥一至於此夫
齊魯甥舅之國魯之姬即齊之姜也齊惠公縱固叔
婚以卑魯而聽其往來莫之禁魯卑而齊亦卑矣
叔孫得臣卒

冬齊高固及子叔姬來

楚人伐鄭

前年楚人侵鄭去年楚子伐鄭今年楚人伐鄭何前後皆人而中獨爵去年伐鄭於歸生弑君之後為有名也靈公弑襄公立逆賊不討儼然在列楚終始執此以問罪鄭將何辭而紛紛力競於鄭人從違去就之間所爭未矣故春秋方爵楚而復人楚

六年春晉趙盾衛孫免侵陳

衛州吁弑其君討州吁者陳也宋萬弑其君討萬者亦陳也陳於弑逆之賊未嘗黨晉方弑其君其背黨

乎故靈公之末既舍楚而從晉成公之初復背晉而
即楚無瑕者可戮人晉亦盍思陳之所以去我者而
盾以元惡帥衛侵之安知陳人不以州吁萬待其來
也凡弑君之賊不再見而盾以侵陳書遂以為親弑
者穿觀靈公欲殺盾而盾先發縱穿為桃園之攻既
弑而盾使穿逆公子黑臀立之穿惟盾之聽耳威振
國人恩結人主晉之政柄一出於盾是猶魯翬弑隱
立桓而翬之專魯益重所以再見示天下以亂臣賊

子之不討也嗚呼嚴矣哉

夏四月

秋八月螽

冬十月

七年春衛侯使孫良夫來盟

公以篡立雖以賂會齊而未會晉猶不敢以為安衛在文公時嘗介魯平晉同盟新城今魯欲與晉會通彼此之情者非衛莫可故良夫來為前定之盟蓋魯

篡晉弑氣類方相求庶其謀之有濟也

夏公會齊侯伐萊秋公至自伐萊

公即位有年矣未嘗一會列國之君奴顏婢膝惟齊是事願指氣使惟齊是聽連年如齊會齊必告至於廟不以臣僕齊為辱而以主齊為榮周公魯公實羞之

大旱

螽未已而大旱繼之一氣胚胎也順氣應則彌滿六

合無非嘉生逆氣應則蟠際兩間無非咎徵精神之所感召方寸之所發見不可掩也夫孝婦仲而旱解弘羊烹而天雨公誠能追念出姜呼天之憾大正襄仲弑君之戮且痛自貶損怨艾以謝國人天意之回其庶幾乎

冬公會晉侯宋公衛侯鄭伯曹伯于黑壤

黑壤一會而四國元惡已逭諸侯之討人極隳矣晉趙盾弑其君夷皋而成公立宋人弑其君杵臼而文

公立鄭公子歸生弑其君夷而襄公立魯則公子遂
弑赤而公立事情輕重雖不同而篡一也篡弑列於
諸侯之會則不討曹人嘗以是請負芻於晉是會宜
討而不討者多矣晉之君臣中有所憲徒能以不朝
不聘止公不敢以非所當立詰公會不與盟竟以賂
解晉何以為盟主魯惟恃賂以立國其何以能國哉
是會蓋春秋之所深痛

